

四庫全書

集部

欽定四庫全書

明文衡卷七十二

明程敏政編

神道碑

安定侯程忠愍公神道碑

朱善

初皇帝念癸卯歲南昌暨康郎山前後死節之臣追爵故萬戶程國勝安定伯與梁國公趙德勝濟陽郡公丁普郎等一體廟祀久之又定元功配享仁祖淳皇帝廟

庭諸外有廟食者亦皆賜諡加勲遣使者致祭有未備禮以葬者官為給之仍勅史臣勒功於神道之碑於是安定伯之兄吉輔以公嘗駐兵富陽愛其地而公族人之在杭者適獻兆于縣西長山之原乃自南昌遷匯而寔焉臣善謹奉詔上故贈開國輔運推誠宣力武臣榮祿大夫柱國安定忠愍侯事曰公諱國勝姓程氏世居徽之休寧初名元佐既從軍上改賜今名其先本陳鎮西將軍開府儀同三司忠壯公靈洗之後忠壯當侯景

之亂保捍州里有功其子散騎常侍威悼公文季死節
于周父子廟食于徽號曰世忠威悼之後其顯于南者
唐御史中丞歙州副統帥湮嘗起鄉兵拒黃巢有忠壯
之風子南節居休寧陪郭甚盛其顯于北者唐六合令
大辯徙中山再徙河南生明道伊川兩夫子靖康末子
孫從渡江居池州再遷徽州陪郭之程互繼其絕譜牒
具存可考也公曾祖榮秀仕元為江浙等處儒學提舉
妣劉氏追封彭城縣君祖文貴宣義郎饒州路德興縣

銅冶場提領妣鄭氏封安人考社至正末用薦為承奉
班都知不赴妣吳氏公生而英偉身長八尺美鬚髯見
者知非常人方元政衰所在兵起公慨然思以自見于
世乃與縣人俞茂婺源人汪同等團結鄉兵以拒寇亂
歲丁酉天兵下徽州衛國公鄧愈發同與公等詣京師
上大悅命同還守婺源而以公等從征伐衛公奏署公
為總管府先鋒分兵與裨將李克魯等徇下方山諸寨
是歲十月苗軍楊諤勒哲部兵十萬薄徽州衛公擇勇

敢士往當之咸推公公率百餘人橫戈鼓譟衝之衆皆
辟易自相枕藉而統軍胡大海之兵適至因覆其營生
禽其將胡辛等二百人楊諤勒哲僅以身免以功遷管
軍總管戊戌正月從擊特穆爾布哈元帥營于婺源正
兵方與之戰公率諸奇兵擣之遂殺特穆爾布哈俘士
卒千餘人三月從攻嚴州道遇長鎗謝元帥軍戰却之
遂拔嚴州五月偽吳張士誠與楊旺扎勒合兵犯嚴州
公敗其舟師于東門追至大浪灘流矢中股引刀出鏃

復戰勇氣彌厲以功進領軍先鋒己亥五月從衛公畧浙西臨安大破張寇于閑林寨庚子七月鄱陽院判于光左丞俞椿擊走偽漢守將辛甲而據之衛公使公往說二人二人遂以饒州來附饒瀕鄱湖而偽漢主陳友諒方據江州數遣舟師來爭衛公與光椿連長營拒之令公結陣敵壘之後絕其歸路賊屢不得志乃引去八月領兵取浮梁偽參政鄧邦佐棄城走進趨樂平偽總管蕭乙率五千人營于險隘衆莫敢先登公以死士持

挺魚貫奮擊之奪其壁以入生禽萬戶彭壽等百人遂
取樂平進攻江西十月衛公駐兵臨川之平塘時鄧克
明據撫州遣使通款而實無降意公贊衛公卷甲夜趨
比旦入其軍克明單騎遁去遂取撫州以功除管軍萬
戶壬寅正月上親討友諒于江州友諒敗走公從衛公
以兵會南昌分定屬邑癸卯四月有詔皇姪以大都督
總諸將友諒益發境內兵以巨艦來攻皇姪分兵拒守
公守寺步門寇犯之與戰虜其將一人寇兵奪氣而潰

相拒凡八十五日寇兵戴竹盾如箕進薄撫州門城壞三十餘丈衛公以火銃擊退之隨立木柵敵奮來爭且戰且築通夕城完公乃與牛海龍乘夜引兵劫賊營海龍為流矢所中以死公泅水得脫見上於金陵具言危困之狀上得公驚喜進陞萬戶上發舟師二十萬自將之令公率親兵宿衛帳下與友諒大戰康郎山友諒驍將張定邊奮前直犯御舟舟適膠淺公仗劍叱之急與帳前左副指揮使韓城水軍元帥陳兆先駕飛舸左右

奮擊會鄂國常公從傍射中定邊虢國俞公疾擢來援
舟進水湧御舟遂脫而公等反遶敵艦之後援兵不接
力戰死之時七月戊子也上聞為之撫膺大慟親為文
以奠焉公春秋僅三十有一配汪氏亦死于難追封安
定侯夫人公平生喜讀書慕節義居家孝友凡運籌決
勝之方不學而能每戰踴躍率先赴敵矢石交下意氣
自如堅城名寨身至力取一軍無不下之者上悉其名
故有賞賚錦衣名馬必先一軍嗚呼癸卯距今蓋二十

五年矣當草昧之時羣雄角逐雖天眷真主畀之爪牙
宣力之臣以佐大業而公等委身効命之死不悔卒之
勲載盟府與古英烈之士儷美齊名其高識絕見則亦
有非偶然者矣仰惟皇上獎忠酬勲度越前古恩禮之
頒不一而足又將次第討論舉行世祿之典書之簡牘
垂之後昆實足以勸千萬世為人臣者乃序其事而繫
之以銘銘曰

巍巍我皇天錫神武龍興江淮以復平土南征北伐拯

世之屯貔虎之臣疏附駿奔有偉程公萬夫之勇世忠
之孫不震不竦維時江浙莽為盜叢大旆東來仗劍以
從始佐元戎有聲幕府遂督偏師孰敢予侮苗軍鷁張
暨彼長鎗公出戎行其鋒莫當徽嚴底平饒撫亦下轡
幢蔽江牙旗載禡西徇臨安以蹴偽吳遏彼楚蠻以殿
鄱湖皇念公勲顯有大賚玉馬錦裘異爾諸帥維是楚
蠻反道不共窺我豫章如蠶如蜂維公誓言廓清江漢
不與賊生背城以戰維皇討賊耀兵江干公在扈行左

右橐鞬敵兵來乘勝負未決死捍御舟勢孤援絕大星
曉殞江水夜悲烈夫介士駢首于危馬革之忠哀動宸
極親奠以文賜之廟食載念艱虞死者如生爰安其靈
官治其塋褒功有爵獎忠有諡匪榮一時以勸百世擴
有衣冠公始蓋棺英魂儼然玉帶貂蟬墓有享堂公在
中寢四時烝嘗來食來飲富陽之山鬱鬱松楸成公之
志奠此高丘神道有碑龜蚨螭首史臣勒銘永詔厥後
大明勅賜開國輔運推誠宣力武臣征西左副

將軍濟寧侯追封滕國公諡襄靖顧公神道碑

劉崧

自昔國家興王之地必有才武雄傑之士出於其間以
贊立大功佐成大業為國虎臣享有祿位豈非天人交
會之應哉故征西左副將軍濟寧侯顧公名時字時舉
世為臨淮人曾祖千四府君以公貴贈鎮國將軍僉大
都督府事護軍追封睢寧縣子妣王氏封睢寧縣子夫
人祖文俊累贈驃騎將軍都指揮使護軍追封武陵伯

妣林氏封武陵伯夫人考道祥累贈榮祿大夫同知大都督府事柱國封濟寧侯妣雷氏繼潘氏俱封濟寧侯夫人公志氣洞儻勇於有為元末政隳海內大亂皇上龍興淮甸思濟天下公以同里率先來附披堅執銳常侍左右自歲甲午起兵西拔和州東渡大江凡擊叛討逆開疆拓境靡不率從始由百夫長轉陞元帥尋同知天策衛親軍指揮使司事繼調濠梁衛丙午詔與東平侯韓政取濠州破四門月城拔之洪武元年戊申從大

將軍魏國公徐達北定燕薊拜驃騎上將軍副大都督
府事兼同知太子率府事三年庚戌論功行賞進號開
國輔運推誠宣力武臣階榮祿大夫勲柱國職同知大
都督府事爵濟寧侯食祿一千五百石賜以鐵券使子
孫世襲焉明年辛亥授征西左副將軍由興元取四川
入階州擒其梟將王進克文州綿州擊向家營寨破之
又克漢州進圍成都偽夏丞相戴壽等望風款附比師
入重慶其主明昇出降四川平五年壬子仍左副將軍

從征北前將軍曹國公李文忠等分道入沙漠與大將軍期失道賣糧且盡士卒不能戰公奮引麾下數百人躍馬大呼衝薄部落戰敗走之遂掠其輜重羊馬而還軍勢復大振七年甲寅從魏國公總各衛兵出鎮北平益築堡障練士伍繕甲兵廣牧畜雖邊隅日靖晝夜從幕府吏深計遠筭常若寇至明年乙卯詔還尋有旨從魏國公仍出北平十二年己未秋遽遘奇疾藥弗能愈以是年冬十一月二十一日薨享年四十有六訃聞上

為之震悼輟朝二日明年庚申春二月己卯公喪歸自北平舟行數千里迎祭填道觀者感歎勅賜葬鍾山之陰上親為舉奠復定誌文以賜之明日詔贈特進光祿大夫左柱國追封滕國公諡襄靖其始終榮寵可謂異數矣配李氏封濟寧侯夫人今封滕國公夫人子男四人長曰敬金吾前衛後千戶所鎮撫次曰英曰華曰苟爾女二人既葬其孤敬泣而請于朝曰惟先臣事上二十餘年不幸蚤終顧神道之石銘文未勒敢援故事以

請于以見聖朝眷待之厚且以慰先臣於地下也於是
禮曹以為言詔可其請命禮部侍郎臣崧為之銘臣崧
職在討論不敢以蕪陋辭謹狀次而書之且系以銘曰
聖人受命萬物咸覩乘時佐運各奮其武矯矯襄靖生
于帝鄉帝猶龍飛雲從之翔自淮渡江首定建業公時
左右執俘獻捷領兵東向遂夷月城電擊颺馳濠梁以
清北收燕薊旋拜驃騎崇勲豐祿券鐵以誓乃命西討
進自漢中取道階文山巉水漲進圍成都作氣一鼓千

夫投戈殄厥孱主既從征北北渡陰山擁禦奮呼出其
險難薄衝部落免脫鵲擊掠其牛馬還給軍食主將上
功帝憫爾勞四方既平汝弓其橐橐弓戢戈北守燕薊
嚴其扃鐃式謹邊事灤水茫茫居庸閑閑馬絕南牧城
無晝闕公歸未期遂以訃告沿邊驚呼當宁嗟悼襄靖
有諡滕國有封茅土新疏沛豐舊庸闡績著銘爰勒神
道榮光自天天子有詔

大明勅賜開國輔運推誠宣力武臣征南副將

軍靖海侯追封海國公諡襄毅吳公神道碑銘
洪武十一年戊午前征南副將軍靖海侯吳楨奉詔出
定遼是秋以疾聞上遣鑒馳驛視之弗能愈遂輿疾還
京車駕幸其第問勞有加明年己未五月疾革以其月
二十有六日薨訃聞上為之震悼輟朝二日詔贈特進
光祿大夫左柱國追封海國公諡襄毅仍賜窆鍾山之
陰俾官給其事葬之日車駕臨奠加贈賻焉又明年庚
申上追念其勞爰勅儒臣禮部侍郎臣崧撰文刻諸神

道之碑以昭不朽臣崧奉詔不敢辭乃追考公牘紀載
第而書之謹按公初名國寶後賜名楨字幹臣姓吳氏
世為濠之定遠人自少時已卓犖有膽略及天下大亂
從上起兵里中即能知天命有在與兄江陰侯良俱隸
麾下悉心委事焉自歲甲午乙未西克滁和東渡大江
揚威振銳所向無敵由帳前都先鋒為總管陞建興翼
院判轉分院元帥尋為天興右翼副元帥與良同守江
陰每寇至輒擊走之首破偽吳張士誠水寨擒其梟將

朱定甲辰授英武衛指揮使丙午寇出馬歇沙上親督戰追至巫子門寇乘潮逆拒首尾相失公縱兵急擊之俘獲無算是秋從大將軍魏國公徐達率馬步舟師由港口取湖州公勒奇兵出舊館扼之戰以大捷事平遂留戍焉吳元年丁未九月復從大將軍攻圍蘇州連破胥葑二門士誠就執公奉令撫循秋毫無所擾進僉大都督府事時方國珍據明州未下上以公為征南副將軍從御史大夫信國公湯和往平之公引舟乘潮夜入

曹娥江夷壩通道出其不意直抵車廐會降者言方氏已潛挈家入海公領兵追於煜嶼與合戰自申至夜三鼓敗之盡獲其戰船人馬輜重而還未幾國珍降有旨由海洋進取福州不數日奄至城下圍其西南水部三門一鼓克之時偽平章陳友定據延平作亂明年洪武元年戊申進破延平擒友定閩海平公歸次昌國會海寇葉陳二姓聚劫蘭秀山公調兵立勦之三年庚戌朝廷定功行賞進開國輔運推誠宣力武臣榮祿大夫柱

國吳相府左相靖海侯食祿一千五百石賜以鐵券使子孫世襲焉五年壬子詔大發兵東戍定遼命公總舟師數萬由登州轉運以餉之海道險遠人用藉虞公調度有方兵食充羨折衝風濤如履四達尋召還七年甲寅海上警聞公復領沿海各衛兵出捕至琉球大洋獲倭寇人船若干俘于京上益嘉賴之常往來海道總理軍務至是歸自遼東而疾作不起矣公生以天曆戊辰六月二十一日薨以薨之閏月十三日享年五十有二

曾祖三七府君贈鎮國將軍僉大都督府事護軍追封
潁上縣子妣周氏追封潁上縣子夫人祖十一府君贈
驃騎將軍都指揮使護軍追封延陵伯妣劉氏追封延
陵伯夫人考似龍府君贈榮祿大夫同知大都督府事
柱國追封渤海侯妣葉氏追封渤海侯夫人配李氏封
靖海侯夫人子男五人長堅西安護衛鎮撫側室陶出
也次忠羽林左衛鎮撫夫人李出也次端次洪五十皆
庶出女十人其第五女許為湘王妃尚在室惟公以驍

勇之才際興王之會鍾英淮甸立勲遼海致位公侯而
不矜不伐盡瘁所事真古之名將哉是宜銘銘曰

赫赫景命大明當天帝業所基公侯出焉桓桓吳公有
佗其勇顧瞻在廷玉立山聳元政不綱帝憫下民爰揮
天戈掃除妖氛始克滌和旋拔采石飛渡大江曾不終
日公時在行兄弟齊一莫不率從干城是力帝命汝楨
言守江陰鄰敵授首遠人歸心南收丹陽東畧無錫建
興策功英武躋職寇窺海口縱兵擊之風從潮生彼逆

不支從攻吳興機畧周布捷出舊館扼其歸路進拔葑
門東定姑蘇擒厥大酋獻于京都帝念爾勞陞秩督府
不曰四明亦肆違拒遄厲戈甲往貳征南挾潮而飛颺
旗電帆撻金伐鼓壁其城下寇窮而遁膽落萬馬躡景
追風執訊凱還鯨奔鯢伏海濤雲鮮張方告平閩海方急
千艘南馳殲彼勍敵三山既隳延平遂通麾旄所指列
郡來同公歸自南蘭秀連梗鋤而闢之海道炳炳帝曰
靖海實汝之功茲命汝侯往承其恭煌煌鐵券翼翼命

秩恩延子孫功翼王室載授征北督餉定遼白粲連雲
颶風不搖倭童跋扈出沒大洋爰獸獮之皇威以張茫
茫遼海烈烈英勇式弘將畧茂對天寵方召元老曹周
世庸氣應德符千載一逢維天祐賢公宜永福何疾之
嬰遽此不淑儀曹考行贈諡有光鍾山佳城天設地藏
神道之左有石嶷嶷儒臣作銘昭示無極

明文衡卷七十二

欽定四庫全書

集部

明文衡卷七十三至六

詳校官庶吉士臣翁樹培

助教臣常循覆勘

總校官降調編修臣倉聖脉

校對官編修臣勵守謙

謄錄監生臣田安仁

欽定四庫全書

明文衡卷七十三

明程敏政編

神道碑

大明勅賜故開國輔運推誠宣力武臣特進榮祿
大夫右柱國衛國公追封寧河王諡武順鄧公
神道碑

朱夢炎

洪武十年冬十有一月初九日開國輔運推誠宣力武

臣特進榮祿大夫右柱國衛國公鄧愈自河州召還至
壽春以疾薨訃聞上哭之哀為輟朝三日詔追封寧河
王諡武順其月十九日柩車至三山門車駕臨奠且親
視其葬地而舊塋在鳳臺鄉者狹隘弗稱上乃遍覽傍
近岡阜擇於城南西山之原寬平爽塏勅有司營建墓
兆仍命遷王母夫人及弟昇之喪同葬焉凡喪事所須
皆官給之恩至渥也上猶念其功不已召臣夢炎等於
廷諭之曰愈事朕二十二年東征西討勤勞至甚厯鎮

八州有功無過爾其撰文刻之石以昭不朽臣謹按公
牘所載賜名愈泗州虹縣人三世弗仕以王貴曾祖父
大公贈資善大夫中書右丞追封臨淮伯曾祖母孟氏
追封臨淮伯夫人祖父大公贈榮祿大夫中書平章政
事柱國追封南陽侯祖母戚氏追封南陽侯夫人父諱
順興贈特進榮祿大夫大都督府右都督右柱國追封
衛國公母張氏追封衛國公夫人王生而魁偉幼有大
志勇力過人元季壬辰天下雲擾王父衛國公起兵於

鄉遂戍臨濠與元兵戰死之王兄友隆代領其衆未幾友隆病卒衆推王領軍事年方十六王出戰必挺身破敵軍中咸服其勇歲乙未上駐師滁陽王自盱眙率所部來附克管軍總管其年夏六月從渡大江克采石取太平繼而元將曼濟哈雅以舟師扼采石陳額森合兵數萬逼城下上親督兵禦之調王與魏國公以奇兵出其後大破之生擒陳額森丙申三月定金陵拔溧水破鎮江王皆與有功陞元帥出守廣德冬十有一月長鎗

謝元帥率衆來寇王出城奮擊俘其總管武世榮及軍士一千餘人丁酉三月轉行樞密院判移戍宣州七月領兵取休寧績溪乘勝克徽州元將敗走十月浙江苗楊元帥率衆十餘萬來攻城時徽州新附城郭未完守禦之器未備王激厲將士明立賞罰與越國公胡大海等分門竝出奮兵力戰大敗其衆生擒部將胡辛等一百五十八人賊衆奔潰婺源元汪同僉領兵來降戊戌正月擊破特穆爾布哈元帥寨斬首五百餘級追至婺源

源東門擒殺特穆爾布哈獲士卒三千餘人遂克婺源
三月取嚴州四月攻淳安縣賊帥金子珍敗走獲馬一
百餘匹降其頭目軍士三千餘人遷同僉樞密院事五
月浙江苗楊復率衆屯徽州烏龍嶺拒却之九月轉僉
書行樞密院事己亥正月領兵略浙江臨安大敗張寇
於閑林寨庚子七月鄱陽院判于光右丞余椿擊走偽
漢部將辛同知取饒州遂以其城來附有旨命王往鎮
之饒城彭蠡湖而偽漢主陳友諒尚據江州數遣舟師

來攻城王敏兵東門外與余椿于光等連營以拒之屢
殲其衆賊兵遂退辛丑正月除江南行省叅政仍兼僉
書行樞密院事總制各翼軍馬饒之境內弄兵者尚懷
疑阻王推誠結納撫以恩信於是左丞吳宏等皆請降
八月領兵襲浮梁偽叅政侯邦佐棄城遁八月取樂平
擊敗蕭總管五千餘衆擒萬戶彭壽等六十八人饒境
悉定進取江西十月駐兵於臨川之平塘時鄧克明據
撫州遣使通款而實無獻城之志王知其情卷甲夜趨

比旦入城克明單騎遁翌日遣人以分省印來獻王號令嚴肅秋毫無犯江右之民室家相慶爭持牛酒迎勞王悉却而不受是時上親討偽漢主陳友諒於江州友諒敗走遂下江西命王以步兵來會車駕至南昌有旨授王江西行省叅知政事留鎮之時壬寅正月四日也癸卯夏四月陳友諒悉國內之兵圍江西江水暴漲寇舟直抵城下王與諸將協謀固守屢挫其鋒賊勢大沮相持者凡三月會上親率援兵至湖口友諒懼而退大

戰康郎山友諒竟死甲辰三月新淦土豪鄧青叛以卒
二萬人據永豐王調兵破之擒首賊胡理問劉右丞五
十一人八月從開平王平臨江之沙坑麻嶺十洞諸山
寨合兵圍贛州降之南安南雄韶州皆送款乙巳正月
進江西右丞加湖廣行省平章出鎮襄陽西抵巴蜀北
控河洛烽火相望新附之民未有定志王撫而鎮之民
懷其惠軍忘其勞遐邇悅服吳元年十月擢拜御史大
夫洪武元年命大將軍經略中原而以王為征戎將軍

征取江淮未取州郡三月攻唐州克之又取南陽生擒
蔡國公史克新等二十七員軍士一千五百人馬一百
五十匹七月克隨州右丞王誠降九月進取洪山老馬
劉寨夜四鼓斬關而入擒殺甚衆冬十有一月率兵討
蜀河奔張獲之金商均房之境悉定三年命王為征北
左副將軍平隴右大敗王保保于定西招諭河州土蕃
諸部元帥何索諾木布哈鄂爾濟汪來等皆納印請降
於是河州以西朶甘烏斯藏等部來歸者甚衆冬十有二月

定功行賞特封衛國公食祿三千石賜以鐵券五年命
王為征南將軍討澧州等處溪洞蠻夷平之九年吐蕃
所部州城邀沮烏斯藏使者掠其輜重有旨命王為征
西將軍往討之十月王與副將分所將兵為三併力齊
入覆其巢穴窮追至崑崙山斬首不可勝計獲馬牛羊
一十餘萬上嘉其功遣使召還未至薨王以元後至元
丁丑二月十五日生享年四十有一兄弟三人長即友
隆弟昇仕至羽林衛指揮僉事先王五年卒夫人曹氏

側室王氏徐氏子男五人長鎮羽林衛鎮撫次銘次鐸
次銓次太平奴皆庶出女四人長女夫人曹氏出也為
秦宮妃次適河南護衛指揮周巖餘尚幼孫女一人王
之葬也以是年十有二月二日丙午惟王器量宏偉而
沉毅簡重謙恭慎密而奉公守法臨大敵而不懼有大
功而不矜又能禮賢下士寬惠愛人廣德宣州歲嚴饒
撫南昌襄陽八州之民至今猶懷其德事母夫人能致
其孝撫弟幼孤能致其愛蓋不獨將略之雄兼有君子

之行宜乎為國元勲光輔帝業而膺寵眷之隆者也謹
再拜稽首而為之銘曰有明受命地闢天開掃清六合
鼓舞羣材惟武順王雲龍風虎仗策來從誓以身許飛
渡大江奮戈前驅斧堅摧鋒何敵不除一舉姑孰再舉
建業颺馳電掣百戰百捷玉節飛雲金戈凜霜有赫其
威往征羣方乃輯浙東乃撫江右大開煌煌厲我城守
孰謂狂豎而敢馮陵自速厥辜江漢底平帝用有嘉平
章湖廣駐節荆南爰資開蕩化仇而恩循暴而柔以德

輔刑澤及八州武功告成四海一統爵以上公受天之
寵烈烈征西極討窮追殲彼大戎張我皇威召還有期
中道而逝九重痛悼三軍隕涕念王之忠開拓建功念
王之德無忝始終何以報之王封是錫袞衣繡裳光賁
泉宅西山之原墓門有石視此刻銘永錫無極

大明開國輔運推誠宣力武臣榮祿大夫柱國同
知大都督府事江陰侯追封江國公諡襄烈吳
公神道碑銘

吳伯宗

洪武十四年十一月二十六日開國輔運推誠宣力武
臣榮祿大夫柱國同知大都督府事江陰侯吳公以疾
薨于青州十二月訃聞皇上為之憫悼輟朝三日詔所
司定贈謚加贈特進光祿大夫上柱國中軍都督追封
江國公謚曰襄烈遣使者迎匭以歸洪武十五年二月
丙子賜塋鍾山之陰上念其功不已命詞臣撰文勒諸
豐碑以垂不朽伯宗職居翰林屬當執筆謹叙而銘之
公諱良姓吳氏鳳陽定遠人初名國興後賜今名氣岸

雄偉性質剛直與弟禎俱以勇力稱元末羣雄竝起海
內鼎沸皇上以聰明神武仗大義奮起布衣公兄弟委
身相從服勤左右上深器焉甲午秋從上取滁州乙未
春從克和陽常為先驅戰皆有功六月從渡大江與元
兵戰於采石拔其營乘勝克姑孰尋下漂水漂陽丙申
從定建康戰功為多又從今大將軍太傅魏國公徐公
達克鎮江下常州屢著功勤歷陞軍職丁酉下江陰命
公以指揮使領兵鎮守時偽吳張士誠據姑蘇跨有淮

東浙右地大物衆兵食富强實江南一勍敵而江陰正當東南要衝喉襟之地士誠又多變詐動以金帛啗誘將士公行上諭之曰彼以其詐我以吾誠爾為邊將慎守封疆約束士卒毋外交毋納逋逃毋逐小利毋與爭鋒惟保境安民而已公奉命惟謹繕城池遠斥堠利器械嚴部伍士卒無敢逃亡無敢出境生事者敵亦畏公之威不敢侵犯數年上親將兵下江西克湖廣平偽漢陳友諒大軍屢出而無東顧之憂者以公之扞蔽也丁

未大軍克姑蘇士誠面縛上以姑蘇承士誠割據之餘
力戰乃服必得剛毅有智略者鎮其地遂以命公公至
奉宣皇上盛德紀律嚴明號令整肅軍民輯睦咸得奠
安洪武三年天下大定論功行賞以公有守江陰之功
封爵為江陰侯食祿二千五百石賜以鐵券子孫世襲
恩至渥也廣西右江諸州僻處炎徼去中國遠數千里
前古號為要荒乍臣乍叛唐宋以來羈縻而已元都北
方相去益遠姑息尤甚其俗狃於仇殺數侵盜邊境五

年春命公將兵討之公率兵深入跋履崇山踐歷險阻
剪除荆棘衝冒瘴霧勤勞特甚數月盡平其地俘獲不
可勝計自是溪洞夷獠畏威懷德革心向化輸租賦奉
法令同內地焉先是上稽古制建親王為盤石藩屏齊
王受封青州命公營建王府宮殿社稷公經營區畫部
署軍卒竝手偕作功成而民不知勞公留青州二載得
疾而薨享年五十有八公自起身行伍至為將帥受封
爵始終一致有功無過故其薨也上深惜之恩禮有加

馬公存時以公貴推恩三代曾祖三七府君贈鎮國將軍僉大都督府事護軍追封潁上縣子妣周氏追封潁上縣子夫人祖千一府君贈驃騎將軍都指揮使護軍追封延陵伯妣劉氏追封延陵伯夫人考似龍府君贈榮祿大夫同知大都督府事柱國追封渤海侯妣葉氏追封渤海侯夫人配高氏封江陰侯夫人子男二人長曰高神策衛試指揮使次曰壽安女三人在室公弟禎亦以勲封靖海侯追封海國公先公三年薨嗚呼古今

豪傑之士際風雲之會攀龍附鳳竭忠勤樹勲烈以名
世者多矣未有如公兄弟同遇聖朝同立大勲同膺高
爵輝映赫奕若斯之盛者也是宜勒諸貞石以光前古
傳後世而垂無窮豈止照耀泉壤而已哉銘曰天啓洪
運大明肇興豪傑率從霧擁雲蒸桓桓吳公剛毅英烈
異才間出萬人之傑天戈義旗飛渡大江爭先鼓勇敢
莫敢當既定金陵亦下京口公俱在行厥績多有江陰
崇墉東南要衝屹若砥柱維公之功姑蘇新附命公綏

靖紀律嚴明大小從令炎荒僻遠命公徂征歷代羈縻
慕義來庭功成汗馬名載竹帛兄弟二人竝著開國河
山賜誓列侯疏封慶延後嗣與國無窮生榮死哀富貴
終始進爵上公錫謚具美鍾山之陰有碑穹然勒銘紀
功何千萬年

皇明開國輔運推誠宣力武臣榮祿大夫柱國西

平侯追封黔寧王謚昭靖沐公神道碑 王景

皇明以神武定四方混一區宇懋德禔祉東漸西被罔

有內外時則有若貔虎之士翊運之臣汎掃爬梳用能
咸和天休以集大命草昧之初各奏爾功歸于有德也
至于內託肺腑而建丕績者則成于天地涵育之功也
是以一舉而開闢闢大業闢矣再奮而運斗樞大政立
矣三厲而西略自西徂南大統一矣翊亮之功昭茲甚
明此皇上之所以始終垂眷大有造于黔寧也王諱英
字某姓沐氏鳳陽定遠人元季天下難作王在童稚喪
所怙鞠于母氏母氏復物故時皇上龍飛鳳陽往拜于

門上奇而有之賜國姓既長機敏過人數從征伐終日侍側無戲色亦無惰容弘量孝恭出于天性上益奇之滋欲試以事壬寅授帳前都尉出鎮鎮江焯有聲績甲辰除廣武衛親軍指揮使軍府肅然尋加昭勇大將軍廣武衛指揮使軍府益律戊申春正月上即皇帝位改元洪武既定鼎命王從征福建擒元平章陳友定三月復王姓鎮建寧三郡三年陞鎮國將軍僉大都督府事四年陞榮祿大夫同知大都督府時天下兵樞交雍詔

出聲生稱上意旨中宮尤屬望焉九年乘傳繇陝右抵
熙河布德澤康遠人事有不便更張以聞明年副寧河
王總大兵征蕃部西渡黃河略川藏耀兵崑崙轉戰千
里俘虜萬計班師論功封西平侯開國輔運推誠宣力
武臣階仍舊榮祿大夫勲柱國食祿二千五百石賜鐵
券又明年八月拜征西將軍將兵征西蕃降元萬戶且
實勒戡及副使松多爾濟鄂溫都爾人卒二萬雜畜二
十餘萬是行平朶甘納琳七站地數千里十三年以陝

西兵征和林元國公托和齊等略額齊訥渡黃河回賀
蘭涉流沙偵騎報去宮廬五十里王分為四翼自以驍
勇衝其中堅衝枚夜薄其營生擒托和齊知院阿珠全
部皆降明年領軍從大將軍出古北口襲公主山長寨
平四郡過驢駒河擄知院李宣還京副征南將軍統兵
征雲南繇辰沅出羅鬼攻普定下之攻普安又下之轉
戰而前元梁王巴咱爾斡爾密以司徒平章達爾瑪軍
曲靖會大霧咫尺不辨壓白石江兩軍相望征南欲濟

王曰我軍遠來利在速戰然衆未集不若以計破之乃陳兵陽若渡者遣奇兵從上流濟草山出其陣後為疑兵元軍見之震動王麾軍泅水渡元軍亦卻陳我師既成列鎧仗鮮明彼皆奪氣遂大戰自旦至晡蹂血震蕩王從鐵騎撞之出而復入生擒達爾瑪于淖元兵遂大潰僵尸相屬乘勝蹙之勢若拉朽梁王棄城走死之收其金寶撫又其民列衛布守諸郡皆納款唯大理不下王率兵攻之段世據龍尾關關險王分一軍夜從間道

登點蒼山襲其背黎明王策馬亂流攻闕闕不守至城前後受敵擒世拔其城會川永昌皆平間使下車里下緬不浹十辰雲南底平夏王與征南分兵東平烏蠻餘寇諸部謂王師東下復叛夷兵二十餘萬圍雲南四十餘日王以鐵師萬人馳救之虜聞拔營夜遁時曲靖永昌皆失守王次第復平之事聞詔征南班師王留鎮焉二十一年春平摩沙勒斬首千餘級三月思倫發以三十萬寇定邊東川廣西往往遙應之王率軍三萬禦之

期日合戰至期分軍為三蠻以象乘高撞我右軍右軍少却王下令曰却者斬左軍與之鏖中軍右軍夾攻之聲震山谷蠻酋刀斯郎斃于象蠻師大奔斬首無算俘萬餘人盡獲其軍實思倫發遂降秋七月東川平冬十月廣西平誅者滿矣情俘五千餘明年平越叛阿資冬朝京師錫宴奉天殿賜金銀楮幣繒綵以萬計尋還鎮上慰曰爾在雲南朕無南顧憂二十四年阿資復叛王親擊之阿資僅免有詔命王還鎮以僉都督何某為平

羌將軍代統其兵討之阿資來降秋遣使招八伯八伯來貢八月錫土田明年夏六月某日王立廳事忽仆于地侍者扶入曰我中風不能起受皇上厚恩不能報矣遂薨時年四十又八軍民罷市巷哭訃聞上哭之慟輟朝制文遣禮部往祭命其子椿以喪歸葬發軍護送所至百司祭于道十月戊午王喪至自雲南上遣中使往祭明日追封黔寧王諡昭靖賜葬于江寧長泰鄉觀音山時某年某月某日也勅百官郊送比葬上諭祭者三

皇太孫親王遣祭者再部府諸司祭者一曾祖考某祖
考某父某竝追封黔寧王曾祖妣某氏祖妣某氏妣某
氏竝追封黔寧王夫人明年塑像功臣廟敕太常祀以
太牢凡葬費皆給所司不煩其家雲南民夷請立廟守
臣以聞制曰可初娶馮氏故追封潁國公國用之女先
王卒追封黔寧王夫人再娶耿氏故贈長興侯某之女
子男五人曰椿馮夫人出也上賜以名由後軍都督僉
事襲爵西平侯今鎮雲南孝友忠勤民夷悅附以兵梟

越叛阿資威震諸夷可謂能繼王之志矣曰某耿夫人
出也僉後軍都督府事曰昌曰景曰昂側室出也女四
人孫女二人夫天地之道尚孝而右忠帝王之政褒德
而顯功王在鎮之二年中宮皇后薨水漿不入口三日
斬衰哀臨終喪三年皇太子薨喪毀逾禮因以成疾孝
足稱矣初莅督府以大學有正心之要綱目得春秋之
旨太極圖明天人之道出師陳情表著忠孝之實終身
披誦不輟家事治而事上必本于忠勤在鎮之日侍衛

不過數十人德可徵矣其馭軍也敵攻無堅城守必飭
從征討則效忠獻謀擐旗斬將及為戎首則神機橫發
出奇制勝功出漏刻有古良將風功可尚矣其為理也
弘毅寬裕招納賢士長駕遠馭恩威兼下墾田至五十
七萬畝而軍實充連歲用師小大戰數十而軍士豫附
忠可見矣嗟乎忠孝昭于身天下仰其光功德著于時
天下被其澤王之事上有子道焉有臣道焉上之撫王
有君道焉有父道焉非他人為君臣者竝也生榮死哀

可謂宜矣銘曰聖皇啓運受命自天王氣浮淮有開必先暨暨將臣天挺神武鼓盪風雲闔闢寰宇五神闡珎挺生異人依光日月下上星辰風雲景從發迹海邦遂荒其區遂搯其吭沈沈樞府我寵居之秩秩皇猷我儀圖之載敷恩澤西涉渭源載敷國威西上崑崙賀蘭之墟流沙之阻兵不頓刃霆驅星昴茫茫井絡氣交神州載清載夷投鞭斷流式遏王誅自爾南夷日日出矣燭火何施天兵一麾仆山摧壑封其鯨鯢以示大僇額額

其城大纛高牙萬方攸同六合一家布德弛威一紀是
釐習爽闇昧莫不惠來皇帝曰咨予嘉乃績黃金大帶
龜判琮璧鈞天無人陟帝左右帝曰嘻哉朕心曷究追
王黔寧錫北京畿以享以祀以介繁禧推尊王爵上及
三世澤逮漏泉無幽不屆子孫繩繩世有封爵先忠先孝
以永天祿觀山之原神道有門刻銘貞石以勒殊勲

明文衡卷七十三

欽定四庫全書

明文衡卷七十四

明程敏政編

神道碑

勅贈開國輔運推誠宣力武臣榮祿大夫柱國同知大都督府事陸安侯許國襄簡王公神道碑銘

有序

劉三吾

許國襄簡公既葬有年洪武之二十年冬十有一月己

亥皇帝御奉天門以工部奏公墓隧之石已具勅翰林
學士院為文賜其家俾鑱焉臣三吾職在紀述不敢控
詞則退而稽其世次官代行事之實序而銘之臣聞天
生聖上聰明時又當元政秕僻寓內幅裂羣雄角起資
以君主治其爭亂則有熊羆之士不二心之臣若徐常
兩王佐命討伐襄簡王公單秉義效順以會其成功大
一統之業者亦天所畀予者哉公姓王諱志世鳳陽臨
淮人性鷙猛有智謀臨陣對敵果毅無前至正壬辰三

月土寇蜂起舉鄉兵取濠州且守且戰甲午前克滁州
勢劇破竹知天命攸歸在今上疏附來從乙未濟江得
采石太平破中丞曼濟哈雅水寨進拔建康丙申七月
調隸總兵同簽樞院徐中山圍常州屢騰柵先登身犯
矢石功聞授懷遠大將軍右副元帥丁酉三月常始下
公功為最後恢復宣州江陰宜興高郵等州府多著戰
績中山悉其能公克摠其智勇故也辛丑秋九月侍上
親下安慶諸郡邑壬寅夏四月復隸中山身先馳戰江

西諸州縣望風崩角癸卯八月乘海艘從御舟蹙陳友諒于彭蠡友諒中流矢死擊走其餘黨于注口之水寨甲辰三月上親征湖廣武昌公暨諸將一稟睿筭與賊選噉遂下之載從中山復廬州拔安豐逐北姑蘇張士誠軍陞飛熊衛親軍都指揮使總兵守禦陸安州明年春改授陸安衛指揮使戰守戢綏敵警民附戊申春正月上正宸極國號大明改元洪武其夏五月奉旨將本衛兵征迤北次汴梁尋調征河南冬十月從馮勝宋國

公渡黃河迤邐進取懷慶澤潞等府州往往所部直前
無堅陣是臘徙鎮平陽居三年移守漢中仍駐師陝西
明年將其全軍深入察罕扎爾絕塞却敵遠遁還軍平
陽冬十一月勅贈開國輔運推誠宣力武臣榮祿大夫
柱國同知大都督府事封陸安侯五年從中山征朔漠
大獲勝而還九月又從傅友德今穎國公征雲南所向
克捷十七年凱還京師十九年八月十七日以疾薨于
第上為之震悼罷朝賻贈有加追封許國諡襄簡公生

元統乙亥正月九日春秋五十有二以薨之十月二日
勅葬鍾山之陰曾祖考四一公鎮國將軍僉大都督府
事護軍追封羅山縣子妣董氏追封羅山縣子夫人祖
考五一公驃騎將軍親軍指揮使護軍追封太原伯妣
甯氏追封太原伯夫人考六三公榮祿大夫同侯妣潘
氏追封陸安侯夫人室潘氏從封許國夫人先公薨生
至順壬申五月十九日薨洪武庚戌三月始葬鳳陽臨
淮至是從公祔焉生男四人長威次城次璣次琛女一

人適黔國公子景祐孫男三女二揆公功行是宜銘詞

曰

先時寓內劄勦弗靖烝民有主資以戡定效用者將鷹
揚其人徐常兩王開國蓋臣各有爪牙奮其威武惟襄
簡公久佐徐府既定江淮亦拓中原自河徂陝益西其
轅繇淮而北極是朔漠轉征雲南卓著勇略時公在軍
沐雨櫛風惟知徇國遑恤厥躬陸安受國方倚大用天
不憚遺黃梁遽夢上為震悼卹典是頒許國襄簡爵諡

具完鍾山之陰公所藏室壽正名垂燦然竹帛有桓其表有穹其碑千秋萬禩永永無期

勅贈開國輔運推誠宣力武臣榮祿大夫柱國同知大都督府事鞏昌侯追封陝國公諡宣武郭公神道碑

洪武二十年冬十有一月己亥皇上御奉天門工部侍郎臣秦達奏故鞏昌侯墓道之碑已具宜得文及時鐫之有旨翰林學士院製文臣三吾職在詞垣不敢以才

學謗淺為辭謹按其世系功勲年爵次第而銘之臣聞
天興聖代大有為之君必篤生瓌偉英勇之將與之會
遇以輔成其大業雖人也實天也當元季王政不綱在
所裂裳為旗荷挺為兵草野自雄罔所適主時則今上
皇帝龍興鳳陽天人合應有若中山開平兩公傑出其
間是固功無與儔矣其知所趨向先後疏附厥有功蹟
若鞏昌侯臣郭子興者亦豈偶然哉子興世鳳陽人奉
勇有膂力善騎射自癸巳歲起兵首隸元帥郭某麾下

即知所適主明年得滁州又明年得和州亦既從龍濟江若采石若太平若溧陽溧水所向崩角義勇之聲日以暴矣丙申三月隨大軍進拔臺城先登授管軍總管繼陞統軍元帥攻圍常州身犯矢石晝夜不解衣甲為生蟣蝨九閱月城始下被賞優渥載調克宣州江陰宜興婺州安慶衢州勢劇破竹壬寅分兵之江西南昌得其全城癸卯八月進克鄱陽彭蠡之戰海艘駢進戒嚴所部人百其勇陳友諒計蹙中流矢死人知天命有歸

癸甲辰春侍上親征湖廣武昌洒血馳戰多所斬獲用
屢功擢鷹揚衛指揮使簡在上心俾從中山王拔廬州
拔安豐率先陷陣大敗姑蘇張士誠為之奪氣其平襄
陽下衡州定澧州辰州轉而蹂高郵踣淮安截拔淞西
湖州坐困姑蘇往往累瘡力戰中山王以公之勇功聞
陞鎮國上將軍大都督府僉都督吳二年正月改洪武
元年上即位有事關陝命領其軍進討中原搤守潼關
三年獻一迹不敢南移戍鞏昌招摩遁殘嚴戢部曲西

戎羌夷兩境帖然進封鞏昌侯方倚之永鎮西陲而溘
先朝露薨于家矣上為之震悼輟朝三日賻贈有加追
封陝國公諡宣武以洪武十七年冬十有二月日葬聚
寶山之原曾祖考某贈鎮國上將軍僉大都督府事護
國追封光山縣子妣某氏從封光山縣子夫人祖考某
贈驃騎將軍都指揮使追封汾陽伯妣趙氏從封汾陽
伯夫人考某贈榮祿大夫同知大都督府事柱國追封
鞏昌侯妣單氏從封鞏昌侯夫人配汪氏封鞏昌侯夫

人皆由公貴貤恩子男四人長景儀卒于五閭次振次
宗次官僧公生以某年某月某日薨以某年某月某日
壽五十有四惟公自開國以來從龍上下盡瘁所事所
至以英勇聞是故攻無不克戰無不勝視轉萬里之遠
歷歲之久若堂奧之朝夕焉雖鋒矢交集飢渴不時咸
不避卹必盪殲渠兇歸報終事乃已其依日月之光仗
雷霆之威以恢拓疆宇勒勛西垂者亦人傑也哉詞臣
揚厲為職是宜有銘詞曰

聖皇受命龍興鳳陽戡定禍亂經略封疆篤生武臣先
後相望維陝國公實生帝鄉沈鷺其勇鐵石其剛乘風
雲會依日月光旌麾所指敵摧鋒芒底定東南載戢戎
羌萬里之遠如在室堂生前封侯式是鞏昌身後封公
亦此西方聚寶之原不食之岡佳城鬱鬱公所固藏詞
臣載筆德音靡忘子孫善保奕世流芳

大明左柱國信國公贈東甌王謚襄武神道碑

銘

方希古

洪武三十一年九月壬辰皇帝御奉天門故東甌襄武王之孫昱頓首言曰先臣和沒已三年墓道之碑已具而未有刻文惟陛下憫之俾史臣有述焉制曰可臣昱至翰林以文為請臣謹以其事聞有詔俾為之銘臣乃言曰昔元德既衰天下大亂我太祖高皇帝以神武明聖之資哀生民之無辜奮袂一麾四方響應爰夷僭盜蕩滌兇奸十餘年間遂濟大業雖曰天命所屬不以智力然猛將名臣之勛著于王室有可徵者昔王之歸鳳

陽新第也高皇帝有餞賜之勅其薨也有祭誄之文帝
自謂與王同受知滁陽稱其智勇過人命勒石以紀勞
績聖情深厚矣今陛下不遺舊而賜銘其碑以寵綏湯
氏實行高皇帝之遺志臣執筆從太史後何敢卒讓謹
按故開國輔運推誠宣力武臣特進光祿大夫左都督
左柱國議軍國事信國公追諡襄武封東甌王姓湯氏
諱和字鼎臣世居鳳陽縣之東湖里曾祖五一府君祖
六一府君皆以王貴追封信國公考七一府君贈特進

光祿大夫右都督左柱國追封信國公曾祖妣某氏祖
妣周氏妣謝氏俱封信國夫人王幼喪二親卓越有奇
志嬉戲常習騎射指使羣兒父老異之及長身長七尺
個儻饒智略元至正間豪傑多起兵據郡縣王亦思自
奮拔以取富貴壬辰歲聞滁陽王據濠兵勢強率所厚
壯士千餘人伏劒從之滁陽王竒王驍勇置之麾下使
從諸將略地每在前行命為百戶取九灣攻濠之定遠
得兵千五百人擢為千戶時高皇帝處滁陽王甥館王

委心推奉率兵從大洪山寨得兵八百陞長萬夫復從
攻滁州其守帥以功多授管軍總管招集士卒益衆又
明年甲午帝自取和州諸將多滁陽王舊部曲顧望未
盡効臣禮惟王以所領兵聽命甚謹帝心嘉焉會義兵
元帥陳額森復攻和州王與將士擊走之乙未六月帝
渡江下采石定太平王獲敵馬三百士卒稱是既而額
森與其將康將軍水陸分道寇城王擊其水軍矢中左
臂怒氣益奮中山王徐公達寧河王鄧公愈帥師由東

門轉戰城北破其步軍遂生擒額森以獻王分兵敗溧水句容克而守之丙申帝定建業三月王偕中山王取鎮江一日克其城兵不血刃陞統兵元帥復同中山王取金壇及富莊七月轉同僉樞密院事丁酉三月克常州奉命鎮守其地攻取江陰明年偽吳張士誠兵寇常州王力戰却之擒其卒三百十月復來寇俘甲士千餘舟數十艘馬數十匹賊勢為之少沮壬寅偕中山王攻無錫癸卯大破士誠兵于楊山斬其梟將獲甲首五百

級逐其別將莫將軍虜其妻子以還拜中書左丞甲辰
士誠弟偽丞相士信寇圍長興王率步將吳福興會開
平王常公遇春軍合戰士信大敗而退超遷中書平章
乙巳擊江西剽盜姚大膽斬之遂取永新州戮偽左丞
周安等籍士馬歸于京師仍出守常州丙午帝命諸將
伐士誠略太湖營于舊館降偽將呂左丞等虜其兵二
千馬八十匹轉戰湖州守將張右丞降進擊吳江州將
不能格亦降遂薄姑蘇圍之明年丁未為吳元年九月

中山開平與王益督兵力戰卒平姑蘇縛士誠以歸三
吳悉定除御史大夫兼太子諭德階榮祿大夫時方谷
珍據溫台慶元三郡與士誠比境聞士誠敗固已震恐
王督諸軍征之谷珍懼乘大舶逃匿海島中王遣人持
書諭以國家威德谷珍即率昆弟子姪待罪軍門得兵
械舟楫以萬計所至不擾王之功居多乘勝下福州戊
申帝即大位改元洪武王略定閩中諸郡至延平主帥陳
友定怙險橫甚令其副出城降觀望持兩端王虜之以

歸東南海上晏然是歲九月帝幸汴梁王實危從既而與宋國公馮勝取懷慶澤潞晉絳二年同中山王拔河中渡河入潼關趨鳳翔越六盤關隴皆平明年與中山王宋國公至定西襲元將庫庫特穆爾營西北取寧夏至察罕扎爾獲其猛將虎陳定東勝大同宣府皆以勞先諸將九月還京師論功行賞錫以鐵券封中山侯號開國輔運宣力武臣階榮祿大夫勲柱國祿一千五百石明玉珍乘中國亂僭號四川以重慶為都玉珍死其

子昇立四年詔王及德慶侯廖永忠統諸將征之昇鎖
瞿塘峽以遏舟師王以計敗之水陸竝進直擣偽都昇
不能支率其臣屬奉金寶以降五年同中山王北征窮
追和林明年甓通州外郭八年移鎮彰德甓其城是冬
追元逋臣巴延特穆爾于察罕扎爾獲馬牛羊無算十
年正月元日帝念王之功加號推誠位特進階為光祿
大夫職為左都督勲為左柱國爵為公國于信俾議軍
國事加祿至三千石仍賜鐵券王益恭畏不自驕盈繼

與岐陽王李公文忠練卒于鳳陽鳳陽濠之賜名也明年巡撫西河州繕完其城郭營舍十四年偕中山王北伐下灰山擒其平章必里克及樞密副使昭通又明年詔至四川永寧治墉濠飭士馬十八年五開山獠為亂王帥師討之夷其窟穴俘戮四萬人及入朝王以春秋高思歸故鄉從容乞骸骨羣公次第以為言帝喜之賜寶鈔五萬俾造第宅於鳳陽而謂王曰日本小夷屢擾東海上卿雖老強為朕行視要割地築城增戍以固守

備王築海上數十城民四丁取其一為兵以守之二十一年新第以成告率妻子陸辭賜白金以兩計者二千黃金以兩計者三百鈔以緡計者一萬五千文綺四十端信國夫人胡氏亦賜金錢文綺甚厚俱降手救褒嘉之二十三年元旦朝于京師忽被末疾且失音不能言帝聞之大驚即命駕臨視嘆悅久之遣歸故里十月詔王之子將命召至邸賜以安車入殿廷燕勞備至復厚賚俾歸以俟有瘳二十七年王疾彌甚不能興帝思見

之特詔與入覲手為摩撫語及舊勞對之雪涕賜鈔六
百五十緡預為塋葬之資二十八年八月七日薨於里
第之正寢至是年七十矣訃聞帝感悼為之不御朝者
三日追封定諡親為文授使者以祭命親王咸遣祭於
其家棺槨明器冢壙皆官為之以是年十一月十二日
葬於縣曹山之原詔肖像於功臣祠配享於太廟祥禪
必賜祭高皇帝禮遇功臣加恩於王恩禮之隆時莫與
比夫人有婦德明詔稱其賢子五人曰鼎署前軍都督

府僉事曰軋太原中護衛鎮撫曰鼎曰變皆早卒曰醴
同知左軍都督府階榮祿大夫將兵征五開卒於軍女
五人長適德慶侯廖權次為魯王妃次適萬泉衛指揮
俞鼎次適景東衛指揮賴鎮之子溶次適楚雄衛指揮
袁義之子興孫男十一人曰昱暹昇晟勗景昇曷旻昊
昱晟其嫡也孫女四人曾孫男一人女二人皆幼王沉
毅質直勇而善斷不妄發言入聞國論一語不泄于左
右行師受任有詔即行不少顧家臨敵果敢堅忍未嘗

挫衄有語及兵書者輒笑曰臨陣決機在智識敏達耳
何以泥古為家畜妾媵百餘暮年皆資遣寧家得賞賜
多惠鄉黨父老及孤貧無告者貴任公宰及歸田里見
故交遺民意驩如也厥後羣公多先物故而王獨享壽
考以令名終斯固保身之有道而始終不倦可謂盛也
已今陛下追維創業之艱顯揚刻銘使播不朽豈獨蓋
覆湯氏之子孫蓋以昭揚先帝之功德而垂萬世也是
用備著其事而獻銘曰

於昭上帝視下孔仁降聖儲才相慈兆民民之顛濟俾
聖康之復俾賢臣佐而襄之有元既衰天厭其亂督生
高皇拯綏大難龍奮於潛八極晦冥英傑如雲翼之以
升惟東甌王既智且武灼知天命早識真主衆方夢夢
未決所從獨斷不疑委身效忠臣或擇君杖策千里生
於帝鄉其社孰似寶劍彫戈折衝四方如虎如貔我武
維揚披淮濟江以作京邑京邑既成皇業乃集東邁偽
吳坐鎮毗陵不騫不傾仗義為城帝德日宣遠懷邇服

王率之行勢若破竹既平姑蘇元惡就誅威鎮東南啓
于海隅乃清關隴乃平幽冀萬邦來同獻其琛貝帝曰
念哉勛我元勛爰啟土疆流慶後昆中山建侯遂公大
國貂冠金券繡裳赤舄海宇晏寧天下一家民休田間
穀粟絲麻王亦白髮燕嬉甲第伊誰致之天子之賜天
子有詔共樂太平文錦兼金侑以百朋內暨夫人亦受
寵錫璽書爛然觀者動色天實生才股肱聖皇豐其第
祿俾之壽康壽考令終孰與之同天子之門式勸有功

沒登王封從饗宗廟始卒無瑕其忠有耀昭哉大明如
日麗天載焯鴻勛以訓萬年

明文衡卷七十四

欽定四庫全書

明文衡卷七十五

明程敏政編

神道碑

湘獻王神道碑文

解縉

自古帝王受命拯溺亨屯必有追崇盛典褒嘉旌異顯
微闡幽昭示來世若成湯之弔龍逢武王式商容之閭
封比干之墓銅盤勒銘燭于千古政有因革異世同符矧

惟我太祖高皇帝功光宇宙道盡君師恩義兼隆子姓
多吉弘祐于我今上皇帝天道顯助震動僕志會朝清
明揖讓底定日月光華黎庶鼓舞申明舊章民物按堵
曾不逾時化危而安易亂而治山川草木皆有喜氣達
孝推恩施由親始惟我太祖高皇帝第十一子湘王純
孝秉哲遇害於苦塊之間窮苦沉抑皇帝嗟悼無已詢
咨羣言褒謚曰獻治其祠墳詔翰林院學士臣縉曰湘
獻王懿德文武嬰茲荼毒朕將昭顯之爾其為文樹石

神道永示無極臣縉仰惟皇上因心篤慶比於成湯周
武弔龍逢封比干之事戚疏等差忠厚有加不敢以菲
薄辭拜手稽首叙次為文謹按謚法聰明睿智嚮惠內
德曰獻惟王幼而美異長而通明溫恭粹德武而右文
讀書窮理自為課程常至夜分不寐篝燈屏枕皆自勤
銘以為警策齋明盛服精思力踐有所獨得於死生之
故天道之微包括宇宙貫一古今人莫能窺其際也嘗
欲著述以開來學手未嘗釋卷開景玄閣延四方賢士

編輯閑富皆有緒而具在可踵而成有益於斯文學者甚厚其平居被服儒素姿體明秀望之玉山晴霞即之春風麗日聽其言澹而不厭和鑒佩玉從容合度自然足以廉頑起懦不自覺其入人之深也然膂力過人握弓矢刀槊上馬奮捷如飛論古兵制前事成敗出人意料降兵反常德進至荆之虎渡王曰敵兵銳甚必有以挫之令漸沮劬若縱使得入塞遺禍將大即日畫計遣將奮前擊之敗其前鋒遂窮追之逆兵由是竟不得出

塞途中數敗至延安殲焉實本王之首挫其銳算無遺策卒成大功太祖益嘉之特召至京慰勞遣還伍開蠻作亂太祖命王率諸軍討之先入據其窟穴遣人四出招諭盡降其衆不戮一人太祖大悅勞遣還國其卓卓大者類如此又嘗造棺槨和藥餌施與軍民之貧者出入以縹囊盛書自隨祁寒暑雨不廢講誦聘問賢士備極恩禮過佳山水古跡徘徊終日必為歌詩文章刻著石上書法深繹晉人精思動合矩度太祖每有制作喜

令書之詩歌豐腴清麗飄飄有出塵之想其文亦燦然
理順造次輒成至於近世科舉之作反覆道義貫通經
傳先生文士佔畢一世所不能盡者其天資高邁不可
及有如此也自太祖賓天哭踊幾絕因忽忽內傷有棄
人間意逮建文君信讒者誣之以罪遣人圍其宮城逼
執之王仰天嘆曰嗟乎吾觀前世大臣遇昏暴之朝將
詔獄下吏便自引決身親太祖皇帝子南面而王太祖
賓天疾不及視葬不及會抱茲沉痛有何樂於世今又

將辱於奴婢之人乎苟求生活吾不能也因復痛哭灑
地沾濕繼之以血具衣冠赴火死闔宮皆從之時洪武
三十二年四月十三日王諱柏母妃胡氏洪武四年八
月初三日生十一年正月一日受冊封為湘王建國于
荊州十八年十二年之國妃吳氏靖海侯禎之女生二女
皆夭無子墓在荊之江陵縣西太暉山之原銘曰猗嗟
獻王孝乎高皇高皇篤愛王此大邦襟喉楚蜀粵惟荆
湘既文既武有輯有攘蠢彼蠻寇蝟而跳梁帝命往征

深入其疆招之畢來人其豺狼帝曰良哉于家有光四
郊多壘變起倉卒戰埃懸空聞者怵惕惟王神武謂彼
奇獍長驅無前奔北以出將遺大難天下罔恤惟王至
仁得人死力受算窮追敵以就殛聖道日還孔繁載籍
惟王經緯有刪有述才兼衆長識邁千古開我後人功
非小補遭讒舍已從容就義不辱其身不降其志抔土
荒煙蕪翳不治縉紳過之尚或流涕巍巍聖皇功高湯
武理其祠墳紓哀泉土龍章金冊繡裳袞衣惟王英爽

象服是碑揭昭天地精神在天帝德王靈垂光萬年

追封奉天靖難推誠宣力武臣特進榮祿大夫右

柱國榮國公加封河南王諡忠武張公神道碑

銘

楊士奇

王諱玉字世美姓張氏世家河南開封之祥符曾祖某
祖某父天佑皆追封榮國公曾祖妣某祖妣劉妣王皆
追封榮國夫人王初仕元為樞密知院已而灼知天命
洪武乙丑自元來歸我太祖高皇帝禮遇甚厚王感奮

思効戊辰從征布裕勒海子哈勒哈之地以功授濟南衛副千戶又從勦布昆特穆爾至延安延川還陞明威將軍安慶衛指揮僉事庚午從征永順散毛諸洞辛未逐北兵之侵邊者至鴉寒山而還調燕山左護衛癸酉追敵至黑松林甲戌征野人等處陞都指揮同知戊寅朝廷用讒加兵親藩事急太宗皇帝不得已舉靖難之師帷幄謀畫悉以任王王推誠致慮夙夜不懈事可否進止衆論紛紜未定者王正色數語決之咸中機宜故凡

舉措必咨於王首用王策奪北平九門撫順討逆三日
城內外悉定師將南出王曰不先定薊州將為後患薊
平餘不足平時薊州守馬宣謀起兵迎拒上命王討之
王至諭之不下環城攻之宣率衆出戰遂執宣殺之并
執指揮毛某王知其可用釋不殺送詣北平遂撫輯軍
民是夜急趨遵化豫戒將士止殺曰師行以得人心為
本遂簡敢勇士四鼓登陴開其城門將士皆入城中始
覺守將率衆拒戰執其將斬之餘不傷一人將吏悉隨

王上謁遂移師永平密雲皆望風輸款從至灤河王進
曰都督潘忠楊松在鄭州阨吾南路宜先禽之上悅遂
親發兵命王為先鋒用其計取涿州雄縣生擒潘楊時
長興侯耿炳文率兵二十萬屯真定王自請往覘之還
言軍無紀律且其上有敗氣無能為上至無極以敵衆
我寡欲試諸將勇怯召問今舉兵所嚮自度可必勝否
衆未有適說王曰今當徑趨真定彼雖衆然新集未齊
我軍乘勝一鼓可破之上曰王言合吾意吾倚王一人

足辦明日抵真定接戰炳文大敗幾被禽獲其左副將
軍駙馬都尉李堅右副將軍都督竄忠及都督顧成等
斬首三萬餘級獲馬二萬復敗安陸侯吳傑軍上召王
諭曰汝之功也非汝與吾意合不及此永平馳報江陰
侯吳高等以遼東兵攻圍城急又謀報曹國公李景隆
引兵數十萬將攻北平城上與王謀先援永平既至高
等望風棄輜重遁王從上追之斬獲甚衆王言大寧去
此不遠請移軍襲之可免後顧從之遂從攻大寧自辰

至午城破斬其都指揮朱鑑執都指揮房寬下令安撫城中頃刻而定北平報李景隆兵圍城遂旋師王請先攻其營然後歸援從之徑搗景隆營大戰三日城中亦鼓譟出表裏夾攻景隆軍不支大敗遁去從攻廣昌蔚州進攻大同悉下諜報景隆收潰散卒號百萬且復至王言兵貴神速先事者勝請往駐白溝河以逸待勞可必勝也上命王率衆馳往駐三日景隆兵至王以精騎馳擊之斬馘無算景隆復大敗收餘卒退保濟南乘勝

追擊圍其城既而解圍還攻滄州獲其大將徐凱進攻東昌敵列陣決戰上以數千騎繞出陣後敵圍數匝上已衝擊而出王不知上所在突入敵陣大戰連殺百數十人王亦被創而歿十二月廿五日云春秋五十有八上哭之慟既旋師諸將皆侍語及東昌事上曰勝負兵家常事不足計所恨艱難之際失張玉良輔吾至今寢不帖席食不下咽隕涕不已諸將皆泣上既正大統行報功之典顧侍臣曰張玉才備智勇論靖難功當第一

惜其蚤沒贈奉天靖難推誠宣力武臣特進榮祿大夫
右柱國追封榮國公諡忠顯追封其三代考妣仁宗皇
帝在春宮數與侍臣言張玉識見謀畧卓然老成非諸
將所及且端方有匡直之益誠難得也既嗣位加封河
南王改諡忠武告於廟以配享太宗親制祭王之文有
秉義懷忠一心為國靖難之際發謀奮勇百戰當前所
嚮風靡大功垂成挺身陷陣惟義所在視死如歸忠精貫
于星日功烈揚於竹帛之褒蓋王為人莊重果毅涉獵

書史明其大義而識慮高遠治家禮法秩然奉命行師
紀律嚴肅與士卒同甘苦未嘗妄戮一人每語麾下曰
為將當濺血戰袍流芳汗簡蓋其殉國之志素定古名
將何過焉配王氏樞密院判執中之女有令德累封王
夫人子男三長輔起武功累進奉天靖難推誠宣力輔
運佐理武臣特進光祿大夫左柱國英國公太師監修
國史知經筵事功德茂碩為國元臣次輓神策衛指揮
使次輓錦衣衛指揮同知女一永樂中冊為敬妃孫男

六長忠授勲衛次鑑次瑾次瑄次斌次某孫女八長洪
熙中冊為敬妃次適清平伯吳英餘在室余陪太師公
在史館經筵久以余永樂洪熙從臣實聞二聖所嘗論
王者屬銘神道之碑敬啟而銘之銘曰

文皇奉天中興邦國桓桓忠武奮起羽翼帷幄密勿長
策深畫上契淵衷魚水之得義旗肇舉伏劍先驅斂域
九門功其權輿取薊遵化如探穴雛執其抗鋒摧朽折
枯龍馭既南大旆在前連下雄鄭遯奮常山長河無險

鐵城不堅撫降殲逆德威並宣決志敵愾恤厥躬精
誠貫日勁氣吐虹聊城之塵髮怒上衝先軫戰旗千載
一忠王勞在國王績在史王嗣象賢益閎以偉帶礪山
河廷有明誓清廟陟配逾千萬祀

奉天靖難推誠宣力武臣特進榮祿大夫右柱國
太子太傅成國公追封東平王諡武烈朱公神道
碑銘

天命仁聖為下民主必生文器材畧恢傑弘偉之士為

之輔翼相與協力一心靖暴亂致治平以建非常之功
夫肇創之績難矣中興尤非易也故前史贊勲臣率以
肇創中興竝言若我太宗文皇帝龍興北藩安宗社於
將危保洪業於永固其功蓋又有難者以一隅之衆而
應四方強盛之敵靡堅不摧靡剛不馴固自天之所定
亦必有材畧恢傑弘偉之佐以效夫疏附先後奔走禦
侮之能是以大功之成勃然莫之能禦也若時東平武
烈王其偉然傑然特出者乎王姓朱氏諱能字弘世

家鳳陽之懷遠曾祖考某妣某氏父亮從太祖皇帝征
伐有功累陞武毅將軍燕山中護衛副千戶謹持行善
撫士有譽於時母某氏王生有令質自少喜讀書事父
母至孝洪武甲戌襲父職事太宗皇帝於藩邸小心慎
恭未嘗少懈而撫恤下人一如其父甚為上所信任旦
夕侍不去側奉天靖難之師初與帷幄密議惟河間忠
武王與王預焉時北平三司之交構造禍者王與忠武
建議率麾下首擒之遂奪城九門撫綏城內外三日人

以大定引兵攻薊州擒其將都指揮馬宣等遂取遵化
永定密雲從上攻灤河既還從克雄縣首破其東門敵
衆敗走追及於月漾橋執其總帥都督楊松潘忠等復
追其餘衆於鄭州斬獲不可數計乘勝長驅入真定大
敗長興侯耿炳文兵時王獨與敢死士三十餘騎追奔
至滹沱河炳文衆尚數萬復列陣嚮王王奮勇大呼衝
入敵陣敵衆披靡自相蹂躪死者無算棄甲來降者三
千餘人工大悅賜書褒諭永平馳報江陰侯吳高以遼

東兵攻城急王從上赴援高遁走王追及之多所殺獲
遂從定大寧戮其拒命撫輯其衆而還時曹國公李景
隆率兵攻北平城王從上至鄭村埧與景隆兵遇大戰
敗之進攻其營又敗之景隆兵列營九門者連敗之城
中亦出兵夾擊景隆狼狽走王從攻廣昌蔚州大同次
第悉下景隆復收潰散之卒號百萬來攻上親拒之王
為前鋒午至白溝河敗其都指揮平安軍及申又與敵
兵戰大敗之明日王領左哨當前鋒又大敗敵兵盡克

其若柵敵走保濟南王率衆追之至鐸山敵嚴兵列陣以待王連破之敵衆釋兵降者萬餘人王以聞上悉撫而縱之蓋自是敵兵戴德皆願來歸無復鬪志然上得之即遣之不留王從攻滄州先破其東門入城斬首六萬餘級敵震懼遂獲其總帥徐凱進攻東昌敵列陣決戰上以數千騎出陣後敵圍上數匝王奮力翼上以出進戰夾河王為奇兵先鋒大敗敵將盛庸兵又敗平安兵于藁城追奔至真定戰其東門斬首萬餘級遂畧彰

德及定州勸西水寨已而敗敵將李文於德州遂克東
阿東平破汶上諸寨設伏肥河敗平安兵十餘萬進戰
小河為敵所乘稍却諸將遽請旋師獨王力勸上行曰
用兵未必常勝宜可因小挫輒自沮項羽百戰百勝竟
亡漢高屢敗而終興自殿下舉兵來克捷多矣此小挫
何足置意但當以宗社為重整兵前進耳上撫掌嘆曰
爾言深合吾心遂行至靈璧敵盛兵迎戰王先登陷陣
大敗之生擒其副總兵陳睥平安叅將馬溥徐真及都

指揮三十餘人獲馬二萬敵衆死者屍蔽原野降者數十萬人悉縱遣之進克泗州渡淮敗盛庸兵遂克盱眙下揚州從上渡江入京師內難平諸王臣民推戴上承大統論靖難功王居首賜號奉天靖難推誠宣力武臣特進榮祿大夫右柱國左軍都督府左都督封成國公食祿三千五百石子孫世襲賜誥券追封三代考皆成國公妣皆成國夫人永樂二年命兼太子太傅四年安南黎季犛弑其國主毒虐下人拒遏詔使數諭弗悛遂

發兵討罪命王總兵佩征夷大將軍印率左右副將軍
左右叅將及神機橫海驃騎游擊鷹揚五將軍兵八十
萬討之瀕行上親送之龍江師至廣西上顧侍臣曰朕
夜察天象西帥有憂其朱能乎然能足辦斯事朕第慮
氣候非其所習耳踰旬訃聞上震悼輟視朝五日一時
同王從舉義者永康侯徐忠等十數人皆入奉慰上灑
泣曰方艱難時協力一心相濟能其首也且其素存心
行事皆應遠到曷遽止此言已益酸楚左右皆流涕莫

敢仰視蓋王至龍州嬰疾薨十月初二日也春秋三十
有七上親為文祭之宸衷悲愴溢於言表讀者皆為泣
下賻卹特厚追封東平郡賜諡武烈王并加贈其三代皆
王爵仁宗皇帝臨御特詔王配享太宗廟廷賜祭之文
猶極褒重蓋當時元功之首也王頎然魁碩勇力過人
器宇宏博智識高遠雍容端重辭氣溫裕廣坐羣議王
折衷之詞簡理當無不心服善馭將士教訓撫恤親若
父子紀律明肅無敢踰越每遇勁敵大呼馳鬪以一當

百敵皆望風辟易懷綏降附恩惠周至出謀制勝靡有
遺策尤善用才人率歸心雖古良將不過是也墓昌平
北澤山之原配王氏累封東平郡王夫人子男若干長
勇襲封成國公太子太保篤實公忠祇勤弗懈歷事四
朝國所倚重次某某官女若干某官某其婿也孫男若
干孫女若干永樂初某侍講禁林凡軍國事預陪廷議
恒與王接知之有素至是太保公屬書神道之碑敬敘
而為銘銘曰明聖之興天實命之必有名世輔翼攸資

文皇大聖奉藩恭恪天將啓之內難奄作有不得已義
旗載揚彬彬文武風雲奮興于時東平雄才弘畧夜寐
夙興密侍帷幄刈違撫順式宣德音環域中外有截一
心金戈所嚮漁陽風靡永平不固大寧傾圯後顧無慮
前驅翩翩折朽雄鄭摧堅中山益都追奔滄州殲逆咸
奮先登電掃霆擊青齊既帖踊躍而南持志決徃宗社
為心靈璧疾下長淮飛渡茫茫圻甸有迓無拒大江無
險內難廓清翼龍升御天開日明國有元良遂兼儲傅

端肅之行寬仁之度南交弗靖奉命徂征師未出疆大
星墮營天不憖遺堂柱遽仆帝聞盡傷卹典隆厚忠存
社稷勲載簡編偉哉嗣興顯顯象賢河山有誓追崇有詔
皇明萬年永配清廟

明文衡卷七十五